

Kastam rampas 2.5 tan ketamin RM100 juta

Sindiket berselindung di sebalik perniagaan produk susu unta, kambing

Oleh Mohd Amin Jalil dan Norzamira Che Noh
bhnews@bh.com.my

Nilai: Jabatan Kastam Diraja Malaysia (Kastam) menumpaskari sindiket pengedaran dadah antarabangsa yang berselindung di sebalik perniagaan produk susu unta dan susu kambing pracamuran selepas merampas 2,500 kilogram atau 2.5 tan dadah bernilai RM100 juta.

Ini berikutan penahanan lelaki warga asing berusia 55 tahun dan wanita rakyat tempatan berusia 40 tahun yang disyaki terabit dalam rangkaian sindiket antarabangsa itu.

Ketua Pengarah Kastam, Datuk Abdul Latif Abdul Kadir, berkata rampasan dadah yang dianggap terbesar itu susulan pemeriksaan ke atas sebuah kontena di Pelabuhan Klang, Selangor, pada 4 Jun lalu.

Katanya, dalam serbuan pada jam 1 tengah hari itu, pihaknya menemui sejumlah paket produk susu unta dan susu kambing pracamuran keluaran tempatan yang turut mengandungi dadah ketamin seberat 2,500 kilogram (kg) atau 2.5 tan.



Pasukan Tempur Operasi Medan Kastam (COBRA) bersama rampasan ketamin yang diisi didalam paket produk susu kambing dan susu unta pracamuran (gambar kecil) pada sidang media di Ibu Pejabat JKDM Cawangan Narkotik Kampung Jijan, Nilai, semalam. (Foto BERNAMA)

“Kontena bersaiz 20 kaki atau 6.096 meter itu tiba dari sebuah pelabuhan di Asia Selatan.

“Hasil siasatan awal mendapati kontena berkenaan yang diikrar sebagai serbuk susu unta dieksport keluar dari negara ini pada akhir 2019.

“Bagaimanapun kandungan di dalam kontena terabit dipercayai ditukar kepada dagangan yang hampir serupa tetapi diisi dengan campuran serbuk disyaki mengandungi ketamin sebelum diimport semula,” katanya di sini, semalam.

Beliau berkata demikian pada

sidang media di Kastam Cawangan Narkotik di Kampung Jijan, di sini, yang turut dihadiri Penolong Ketua Pengarah Kastam, Datuk Johari Alifiah dan Timbalan Ketua Pengarah Kastam Cawangan Narkotik, Koh Joo Kai.

Abdul Latif berkata, kedua-dua suspek kini direman 10 hari bermula 4 Jun lalu bagi membantu siasatan kes mengikut Seksyen 39B Akta Dadah Berbahaya (ADB) 1952.

Katanya, rampasan itu adalah kejayaan terbesar Kastam dalam konteks dadah tahun ini dan kes pertama modus operandi menggunakan produk pracamuran.

Sementara itu, di Pelabuhan Klang, Kastam mematahkan cu-

baan menyeludup 83,000 liter air zam zam yang dianggarkan bernilai RM1.3 juta dalam satu operasi di Pelabuhan Barat, dekat sini.

Penolong Ketua Pengarah Kastam Zon Tengah, Datuk Zulkurnain Mohamed Yusuf, berkata cubaan menyeludup itu dipatahkan selepas Bahagian Penguatkuasaan, JKDM Zon Tengah, Unit II (Selangor) melakukan pemeriksaan ke atas tiga kontena, pada 4 Jun lalu.

“Hasil pemeriksaan ke atas tiga kontena berkenaan mendapati barang dagangan yang dibawa adalah air zam zam, sedangkan ia diikrarkan membawa muatan buah kurma dari Asia Barat” katanya dalam kenyataan, semalam.